

KATALUNA ESPERANTISTO

MONATA ESPERANTA GAZETO

DUA EPOKO - JARO 1^a : JANUARO 1921

KATALUNA ESPERANTISTO

MONATA ESPERANTA GAZETO

OFICIALA ORGANO DE "KATALUNA ESPERANTISTA FEDERACIO"

REDAKCIO KAJ ADMINISTRACIO: CARME, 30 - BARCELONA

REDAKTOROJ

JAUME GRAU, ĈEF-REDAKTORO

S. ALBERICH JOFRÈ

ARTUR DOMÈNECH

ROMÀ GUARDIET

ĈIUJN VENDREDOJN, JE LA 10^a VESPERE, OKAZAS REDAKCIA KUNVENO.



KATALUNA ESPERANTISTO

OFICIALA ORGANO DE

Kataluna Esperantista Federacio

Redakcio kaj Administraĉio :
Carme, 30 : BARCELONA

Nia devizo: *Maro estas gutaro*



EN KATALUNA ESPERANTISTO aperas de-
nove por vekaj ĉiujn katalunajn esperantis-
tojn... Post tiom da tempo de dormado, ni
rekomencas la laboron kun fervora espero ke
niaj klopodoj instigos ĉiujn helpi nin, por atingi tre bal-
daŭ la antaŭan brilecon de la esperantista movado en
Katalunujo.

Ni ne parolu pri la kaŭzoj de la lastatempa neago de
la esperantistoj en nia lando kaj pretiĝu al tuja laboro
por gajni la perditan tempon; ke ĉiuj samideanoj oferdo-
nu sian kapablon kaj tiel ni povos plej rapide iri la vojon
celitan...

Ni kore salutas la tutan samideanaron kaj esperantan
gazetaron, ni antaŭdankas la ricevotan helpon kaj ni pe-
tas indulgan bonvolemon por la plenumo de nia tasko,
al kiu ni nur povas oferi niajn junajn fervorojn.

LA REDAKCIO

Ĝenerala Kunveno de la Kataluna Esperantista Federacio

Barcelona : 10^{an} de Oktobro 1920a



LA 10^{an} de Oktobro, matene, okazis ĉe la sidejo de «Ateneu Enciclopèdic Popular» la Ĝenerala Kunveno de Kataluna Esperantista Federacio.

Oportune ĝi estis anoncita sur la Federacia Bul-teno, kun peto ke ĉiuj samideanoj ĉeestu, kaj certe la nombro da ĉeestantoj estis kontentiga. Inter ili troviĝis reprezentantoj de diversaj Grupoj.

Okupis la prezidan lokon la Prezidanto S-ro. Enric Aguadé, akompanata de ĉiuj membroj de la Direkta Komitato.

S-ro. Aguadé malfermas la kunsidon kaj paroladas montrante la malfacilaĵojn renkontitajn de la Direkta Komitato, ĉefe tiujn kiuj malhelpis la okazigon de la IX Kongreso de la Federacio en la urbo Girona, laŭ la deziro esprimita de la lasta Kongreso en Manlleu. Li pravigas la okazon en Barcelono de la nuna ĝenerala kunveno, kaj diras ke la renkontitajn malfacilaĵojn pli detale konos la ĉeestantoj per la raporto legota de la Sekretario. Esperinde estas ke oni klopodos eviti ilin en la estonteco.

La Sekretario, S-ro. Jaume Grau, stariĝas kaj legas la jenan raporton:

«Gefederacianoj:

Iom malĝoje mi plenumas la devon raporti al vi la bedaŭrinde senefikan agadon de la Direkta Komitato kiun vi elektis la pasintan jaron, dum nia Kongreso en Manlleu.

Vi ja scias ke tiu Kongreso okazis post longedaŭra epoko dum kiu la vivado de nia Federacio estis malforta, kaj ke la tiam farota tasko ŝajnis esti klopodado por atingi la tutan revigliĝon de la K. E. F., kies ekvekiĝon ni povis konstati per la brila sukceso de tiu rapide organizata Kongreso.

Kompreneble, la tasko kiu prezentiĝis antaŭ ni estis eksterordinara kaj sekve postulis eksterordinarajn fortojn; malgraŭ tio, la ĵus elektita Direkta Komitato rimarkis baldaŭ ke en ĝi ne sin trovis la postulataj kondiĉoj pro diversaj malfavoraj cirkonstancoj, kaj en sia unua periodo ĝi jam ne povis tute agi kiel estis dezirinde, post kio alvenis unu post la alia diversaj malfacilaĵoj.

Tuj de la komenco iĝis tre komplika la funkciado de tiu Direkta Komi-

tato, pro tio ke la Prezidanto loĝis en Reus, la Direktoro de la Bulteno en Terrassa, la Administranto en Sabadell, la Sekretario en Barcelono, kaj la aliaj Komitatanoj estis dislokitaj ankaŭ en Barcelono, Sarrià kaj Sabadell.

Tamen, ni pretiĝis al laborado tiel fervore kiel eble. Ni petis al la Grupoj «Studenta Juneco» kaj «Ĝerona Espero» el Ĝerono, ilian opinion pri la propono farita de Ĝerona samideano okazigi en tiu urbo la venontan Kongreson. Ricevinte la deziratajn informojn ni sciigis ke la propono estis farata sen oficiala karaktero kaj ni konvinkigis pri la tuta neebleco realigi tiun proponon.

Poste ni esploris la eblecon okazigi la Kongreson en la urbo Manresa ĉar aspektis iel facila ĝia organizo, sed tamen, pro la malgranda nombro de tieaj esperantistoj kaj manko de helpantoj, tiu provo ankaŭ ne prosperis.

Tiu sama manko de helpemo kaj krome nesufiĉeco de financaj rimedoj malpermesis la regulan aperadon de nia Bulteno, de post la Januara monato ĝis nun. Ni pripensadis ofte kiamaniere solvi la problemon de la ĉiumonata aperado de la Bulteno sed tiun solvon ni ne povis ekvidi: estas necese postuli de la federaciaj pli altan kotizon kaj pli proksiman kunlaboradon.

Krom tiaj aferoj — malfacilaĵoj kiujn ni ne sukcesis venki — altiris nian atenton la okazo en Barcelono de tiu nomata «Unua Diskutanta Kunveno de Esperantistoj de Iberiaj Landoj».

La 21^{an} de Januaro 1920^a la Prezidanto de K. E. F. ricevis de «Esperantanaro FAJRO» komunikajon sciigantan pri la organizo de tiu Unua Diskutanta Kunveno, kaj la Sekretario ricevis alian de la Grupo «La Meliŝto» invitantan lin al la proksima kunveno de la organizantoj, kiu okazis la 25^{an} de la sama monato.

En tiu kunveno, kiun mi ĉeestis pro neebla ĉeesto de la Prezidanto kiel Sekretario de K. E. F., la organizantoj klarigis al mi la celon de la U. D. K. E. I. L. kaj petis la aliĝon de la K. E. F.

Mi respondis, farinte kelkajn konsiderojn, ke mi transdonos tiun peton al la Direkta Komitato kaj ke ĝi sciigos ilin oportune pri sia decido.

La morgaŭan tagon mi faris longan raporton pri la de mi ĉeestita kunveno kaj sendis ĝin al nia Prezidanto kaj al la Direktoro de la Bulteno, por ke ili konu detale la staton de la afero. Tiun raporton konis la organizantoj de U. D. K. E. I. L. kaj ĝi meritis ilian aprobon.

La Prezidanto kunvokis la Komitatanojn al kunsido okazinta en Barcelono la 15^{an} de Februaro kaj ili ĉiuj sciigis pri la invito aliĝi la Udeilon farita al la K. E. F. Oni unuanime decidis ne aliĝi al ĝi kaj komuniki tion al la organizantoj, aldonante ke la kaŭzoj de tia decido estos publikigataj sur la Bulteno de K. E. F. Tiujn decidojn partoprenis ankaŭ la Prezidanto, ne povinta ĉeesti pro bedaŭrinda subita morto de sia filo.

La deca komunikajo estis sendata kaj en alia Komitata kunsido oni decidis publikigi en la Bulteno kaj sendi al la organizantoj de U. D. K. E. I. L. la jenan noton:

«La KATALUNA ESPERANTISTA FEDERACIO nepre devas vidi kunplezuro ĉies agadon por Esperanto kaj tial ĝi konsideras meritindaj la klopodojn de la organizantoj de la Unua Diskutanta Kunveno de Esperantistoj de Iberiaj Landoj; sed la K. E. F., kiel supera esperanta organizaĵo en Katalunio, ne povas dece aliĝi kaj partopreni apartajn agadojn de apartaj esperantistoj, ĉar oni devas eviti la riskon treni ĝin al afero kies esperinda sukceso estas tamen malcerta.

Nur pro tio la KATALUNA ESPERANTISTA FEDERACIO ne aliĝas la Diskutantan Kunvenon, kvankam ĝi respektas ĝian agadon kaj lasas al siaj anoj plenan liberecon aliĝi individue.

La Direkta Komitato de la K. E. F. pravigos sian decidon dum la venonta Kongreso. Barcelono, la 13^{an} de Marto 1920^a».

En tiu noto estas klare esprimataj la kaŭzoj de nia decido kaj vi devas diri ĉu ni trafis.

Mi finos, rilate tiun aferon, dirante ke ni agis ĉiukaze tute korekte kaj ke ni ne kontraŭstaris nek malhelpis la aranĝon de la Unua Diskutanta Kunveno, restante pure kaj simple en la situacio de ne partoprenantoj.

Sed, karaj samideanoj: Nia Kataluna Federacio, kies brilan historion atestas tiom da sukcesaj kaj fruktodonaj kongresoj, tiom da belaj literaturaj festoj kaj propagandaj solenaĵoj, tiom da kuragigaj kaj entuziasmaj vortoj aperintaj en la multvaloraj paĝoj de ĝia presorgano; nia Federacio, kies lertan kaj efikan agadon montras tiom da esperantaj profesoroj, eminentaj pioniroj kaj fervoraj samideanoj kiuj formigis apud ĝi sub ĝia ama kaj atenta rigardo; nia Federacio, kies unuaj aliĝantoj estis la rikoltado de la kampo kulturita dum la Barcelona Mondkongreso; cu ĝi devas kviete kaj senenergie vivadi, rigardante kiel enlandaj samideanoj dise batalas ekster ĝi, ĝuste en la momento kiam estus preferinde ke la tutaj batalemaj fortoj estus forĝataj kaj ordigataj en ĝia interno?

Ĉu la Kataluna Federacio devas permesi, ne agante tiel kiel la momento postulas, ke estu samideanoj kiuj sin sentas malproksimaj de ĝi kaj pro tio estas pretaj senzorge kuradi post tro rapidemaj batalantoj, ne konsciante ke oni povas senintence malhelpi la movadon per tro altcelaj kaj nematuraj propagandoj?

Unuvorte, ĉu la Federacio povas ne daŭrigi sian altan laboradon de antaŭaj tempoj?

Mi ne respondas al tiuj demandoj, ĉar mi esperas ke vi faros tion hodiaŭ decidante per via sindonemo kaj fervoro kia estas la vojo kiu nin kondukos al la celo.

JAUME GRAU

Unuanime estas aprobata la Sekretaria raporto.

La Administristo, S-ro. Pere Casanovas, legas la bilancon kiu same meritas la ĝeneralan aprobon.

La Sekretario sciigas la aliĝon al la Kunveno de la jenaj societoj kaj samideanoj: «Esperanta Idealo» el Santa Coloma de Farnés, «Ĝeronprovinca Esperantista Ligo», S-roj. Pere Costa, el Santa Coloma, Pere Domènech, el Vilassar de Mar, Joan Campdelacreu, el Manlleu.

S-ro. Joan Gili, delegito de la Grupo «Barcelona Stelo», prezentas ses proponojn kiuj estas kune legataj kaj poste diskutataj unuope.

Unua propono: Ke ĉiuj membroj de la Direkta Komitato, aŭ almenaŭ la plejmulto, loĝu en unu sama urbo.

S-ro. Gili defendas la proponon klarigante ĝian celon atingi ke la D. K. havu la eblecon laboradi plej intense. S-ro. Serrat esprimas sian opinion ke la D. K. povas esti efike helpata, se necese, de la Konsulta Komitato konsistanta el la Prezidantoj de ĉiuj aliĝintaj Grupoj.

La Kunveno aprobas la proponon de «Barcelona Stelo» kaj konsideras konvena la reorganizon de la Konsulta Komitato, laŭ propono de S-ro. Serrat.

Pri urĝa afero petas permeson paroli S-roj. Alavedra kaj Serrat, kiuj anoncas ke post iom da tempo alvenos en Barcelonon ŝipo kondukanta kelkajn esperantistajn aŭstrajn infanojn, kaj, ĉar ili ambaŭ estas membroj de la Komitato «Pro Infanoj», ili devas forlasi la Kunvenon por iri akcepti la alvenontojn.

La Kunveno aklame petas al S-roj. Alavedra kaj Serrat ke ili salutu la infanojn nome de «Kataluna Esperantista Federacio».

Post tio, oni daŭrigas la Kunvenan taskon.

Dua propono: Ke la jarkotizo por federaciaj plialtiĝu ĝis 5 pesetoj.

Post mallonga diskuto, kiun partoprenas S-roj. Ramón Vila, Pasqual Martínez kaj J. Canales, ĝi estas unuanime aprokata.

Tria propono: Ke estu permesate al la D. K., se tio montriĝus necesa, difini honorarion por la Redaktoroj de la oficiala presorgano de la Federacio.

La proponon defendas S-ro. Gili kaj aprobas la ĉeestantoj.

Kvara propono: Ke, anstataŭ la nuna simpla «Bulteno», aperu denove la fama gazeto «Kataluna Esperantisto» kiel Federacia presorgano.

Defendante tiun proponon parolas S-roj. Gili kaj Doktoro Bremón, post kio ĝi estas entuziasme aprokata.

Kvina propono: Ke la Redakcio kaj Administracio de la gazeto loĝu konstante en Barcelono, kvankam la Direkta Komitato troviĝos en alia urbo.

La propono celas ke la Redakcio estu en fiksa loko, ĉar eble prezentigiĝos malhelpoj se ĝi varios ĉiujare.

Ankaŭ la nuna propono estas unuanime aprokata.

Sesa propono: Ke oni petu monsumojn de la sindonemaj samideanoj por helpi la efektivigon de la aprobitaj proponoj.

Pri tiu lasta kaj grava propono parolas S-roj. Gili, Bremón kaj Amades, kaj ĝi meritas la aprobon de ĉiuj ĉeestantoj.

Laŭ peto de la Prezidanto S-ro. Aguadé, la Kunveno esprimas sian dankon al la fervoraj samideanoj de la Grupo «Barce-

lona Stelo», pro la entuziasmo kaj laboremo montritaj per tiom da saĝaj proponoj.

Oni legas komunikaĵon de la Grupo «Nova Sento» enhavantan proponon, kiun la anoj de tiu societo decidas konsideri ne prezentita, post kelkaj klarigaj vortoj de la Direkta Komitato.

S-ro. Josep Ezquerro petas al la Kunveno, je la nomo de la esperantistaj blinduloj, ke oni akceptu ilin en la Federacio laŭ specialaj kondiĉoj. La Prezidanto respondas ke oni konsideros kaj solvos tiun aferon kun granda plezuro.

Antaŭ ol esti elektataj la novaj Komitatanoj, S-ro. Jaime Grau, Sekretario de la finanta Komitato, petas permeson paroladi por fari kelkajn konsiderojn rilate la elekton de la novaj Komitataj membroj.

Li komencas dirante ke li parolos klare kaj sincere. Estas evidente ke la Kataluna Esperantista Federacio ne agis lastatempe tiel intense kaj efike kiel estas necese; estas certe, ankaŭ, ke multaj valoraj esperantistoj troviĝas ankoraŭ ekster la Federacio; kial tiaj esperantistoj ne eniras en ĝin por replenigi ĝiajn malpliigitajn vicojn?; ĉu ne estus tio la plej bona rimedo por eviti tiun malmultan nesufiĉan laboradon kiun oni al la Federacio riproĉas? Estas necese ke ĉiuj enlandaj societoj kaj samideanoj partoprenu la taskojn de la K. E. F. kaj en ĝi sin sentu reprezentataj; ĉu estas io pli bona por tio ol ke ĉiuj diversaj rondoj da samideanoj donu al la elektota Direkta Komitato unu el siaj fervoruloj? Tiam estus garantio por ĉiuj ke la Komitato laboros kaj jen sendube la unua paŝo por atingi tiun deziratan unuecon, kiun plena sukceso de nia movado postulas. Tian unuecon ni devas celi ĉar certe ĝi helpas akiri la necesan forton por starigi kaj subteni vivoplenajn organizaĵojn kaj disvolvi dece niajn energiojn. Sed nepre kondiĉo por tio estas ke ĉiuj aliĝu al nia Federacio, kaj ne nur aliĝu sed firme laboru, laŭ deklaro kaj rekomendo de la antaŭ ne multe okazinta «Unua Diskutanta Kunveno de Esperantistoj de Iberiaj Landoj»; aliĝante al ĝi, oni ankaŭ helpas la starigon de la Konfederacio Iberia; estas necese, do, ke ĉiuj Katalunaj esperantistoj estu pretaj akcepti postenon ĉe la Federacia Komitato kaj rekte partopreni ĝian laboron, anstataŭ sin teni kritike antaŭ ĝi. Ni kunigu ĉiujn fervorojn kaj tiam ni marŝos tra la bona vojo...

Oni aprobas per ĝenerala aplaŭdo la vortojn de S-ro. Grau.

Por faciligi interkonsenton interrompiĝas la kunsido dum dek minutoj kaj poste estas aklame elektata la jena Direkta Komitato:

Prezidanto : Joan Gili Norta; Joan Amades, S. Alberich Jofrè, Jaume Claramunt, Pere Navas, Jaume Pruna, Enric Adam, Josep Serrat, Jaume Vilaseca, Jaume Grau.

Post ol esti legataj la nomoj de la novaj Komitatanoj, la Prezidanto S-ro. Aguadé esprimas sian fidon ke ili senlace laboros por la bono de nia afero kaj la Kunveno finiĝas meze de granda entuziasmo.



Oficiala Parto

RUNVOKITAJ de nia prezidanto S-ro. J. Gili, la novaj komitatanoj kunvenis la 17^{an} de oktobro en la sidejo de Ateneu Enciclopèdic Popular por studi la reorganizon de K. E. F. kaj sekve puŝi ĝin al plena sukceso.

La komitatajn rolojn oni disdonis jene:

Vicprezidanto: S-ro. Joan Amades.

Sekretario: S-ro. S. Alberich Jofrè.

Vicsekretario: S-ro. Jaume Claramunt.

Administristo: S-ro. Pere Navas.

Kasisto: S-ro. Jaume Pruna.

Voĉdonantoj: S-roj. Josep Serrat, Enric Adam, Jaume Vilaseca kaj Jaume Grau.

Kiel Redaktoron de «Kataluna Esperantisto» oni elektis S-ron. Jaume Grau, kiun helpos federacianoj S-roj. Artur Domènech, S. Alberich Jofrè kaj Romà Guardiet.

Pri tiu unua kunsido la komitatanoj konservas profundan, kuraĝigan impreson naskitan de l' fervora oferemo montrita de ĉiuj.

Estas plej kompreneble ke nia Federacio atingos sian antaŭan postenon, nur kiam ĝi povos aperigi sian organon regule kaj per ĝi ligi la rilatojn de ĉiuj samideanoj en Katalunujo, kie malgraŭ la grandaj perdoj kaŭzitaj de la militperiodo nia afero kalkulas multajn kaj valorajn adeptojn.

Por efektivigi tiun nian plej grandan deziron ni decidis tuj entrepreni la vojon montritan de la ĝenerala kunsido; havigi al la kaso de K. E. F. kapitaleton, kiu sendanĝerigos la aperadon de «Kataluna Esperantisto» kaj malfermos al ni vastan kampon por frukta laborado.

Ke la alvoko estis aŭskultata, tion montras la sekvanta listo de mondonacintoj:

KAPITALO DE KATALUNA ESPERANTISTA FEDERACIO

UNUA LISTO

Joan Gili Norta	Ptoj.	100 —
Enric Adam Tous	>	25 —
J. Bremón Masgrau	>	100 —
Estanislau Pellicer	>	25 —
Delfi Dalmau	>	25 —
C. B.	>	25 —
Pere Navas.	>	10 —
J. M. Segura	>	5 —
Pere Lliteras	>	5 —
Josep Quatrecases	>	25 —
Enric Aguadé	>	20 —
Pastro Josep Casanovas.	>	10 —
Pastro Josep Planas	>	5 —
Josep Guixà	>	5 —
Grupo «Barcelona Stelo»	>	45 —
Artur Torné	>	25 —
Gustau Galceràn	>	25 —
Mariàn Solà	>	20 —

Sumo jam enkasita Ptoj. 500 —

Kun la certeco ke nia organo ne povos malaperi, ni tuj eldonis la manifeston kiun konas ĉiu federaciano, kaj jen de lokoj, kie laŭŝajne nia afero estis mortinta, venas novaj aliĝoj kaj kuraĝigaj leteroj de batalpretaj samcelanoj.

* * *

Tuj kiam ni sciigis pri la propono de Japanujo en la Ligo de Nacioj, enkonduki Esperanton kiel oficialan lingvon de tiu organizaĵo, ni sendis la jenajn telegramojn:

«Delegito Japanujo — Ligo Nacioj — Genève. — K. E. F. vin gratulas dezirante atingi triumfon propono alpreni Esperanton. Prezidanto, Gili-norta».

«Prezidanto Ligo Nacioj — Genève. — K. E. F. aliĝas dezirante triumfon propono Japanujo alprenante Esperanton lingvon tiu Ligo. Prez. G.»

«Delegito Hispanujo Ligo Nacioj — Genève. — K. E. F. rekomendas akceptu proponon Japanujo favoran alpreno Esperanto lingvo Ligo. Prez. G.»

«Universala Esperanto — Asocio, Genève. — K. E. F. esperas vi helpas delegiton Japanujo, Ligo Nacioj, triumfigi proponon favoran Esperanto. Prez. G.»

«Prezidanto Konsilantaro Ministroj, Madrid. — K. E. F. esperas ke Hispanujo akceptos proponon delegito Japanujo pri enkonduko lingvo internacia Esperanto kiel oficiala Ligo Nacioj. Prez. G.»

Bedaŭrinde, du tagojn poste la gazetaro neis la verecon de la telegramo, kiun ĝi publikigis antaŭe, kaj niaj telegramoj atingis la adresatojn ne sen veko de intereso kaj atentigo, ke nia lingvo havas ĉie partianojn enkonduki ĝin kiel oficialan en la Ligon.

* * *

Kun danko ni devas konstati ke la fama kaj ekskluzive kultura societo «Ateneu Enciclopèdic Popular», en kies interno disvolviĝas la Grupo Esperantista «Semo», malavare proponis al ni sian sidejon kaj ke ni akceptis kun ĝojo kaj plezuro tiel karan proponon.

* * *

Unu el niaj unuaj laboroj estis ankaŭ legitimigi nian Federacion, kiu lastatempe funkciadis eksterleĝe, kaj enskribigi nian novan sidejon, Carme, 30, Barcelona.

S. ALBERICH JOFRÈ, SEKRETARIO

ENLANDA MOVADO

Ni petas la Grupojn bonvolu sendi al ni raportetojn pri interesaj aferoj, kiujn ni publikigos kun plezuro sur paĝoj de Kataluna Esperantisto.

—Celante la rapidan vekigon de ĉiuj samideanoj en la tuta Katalunujo, ni entreprenis diversajn vizitojn al katalunaj urboj kaj vilaĝoj kaj ili atingis la plej grandan sukceson, dank' al la afableco de la vizititaj samideanoj kaj al la entuziasma laboremo de la vizitantoj. Dum la lastaj monatoj Novembro kaj Decembro okazis vizitoj al Sabadell, Reus, Terrassa, Vendrell, Mataró, Molins de Rei, Ripollet kaj Girona.

La vizitantoj estis S-roj. Gili, Grau, Domènech, Mendiri, Pellicer, Pruna, Alberich, k. a., kiuj samtempe aranĝis kelkajn aferojn rilatantajn la bonan funkciadon de nia Federacio. Rezultatojn de tiaj vizitoj oni vidos post ne longe.

EKSTERLANDA MOVADO



ESPERANTO ĉie triumfas kaj ĝia triumfo bruege resonas eĉ en la plej altaj ŝtataj rondoĵoj kaj kleraj sferoj en ĉiuj landoj. Ĉio antaŭdiras proksiman definitivan venkon. Tial ni klopodos por ke tiu ĉi fako de K. E. estu unu el la plej interesaj por niaj legantoj, transdonante al ili ĉiujn plej ĵusajn interesindaĵojn okazintajn eksterlande, rilatantajn la triumfan antaŭeniradon de nia lingvo.

Tamen en tiu ĉi numero la legantoj sendube rimarkos mankon de freŝeco kaj eĉ malmultenombrecon en la sciigoj per kiuj ni inaŭguras tiun ĉi fakon; sed ili devas indulgi nin konsiderante ke, tial ke nia reapero ne estas antaŭanoncita eksterlande, al nia redakciejo ne alvenis ankoraŭ la alilandaj gazetoj el kiuj ni estas elĉerpontaj la disvastigotajn novaĵojn.

Ni danke ricevos mallongajn publikindajn raportetojn pri la agado de esperantaj grupoj kaj organizaĵoj en eksterlando kaj plezure ni akceptos interŝanĝon kun la tutmonda esperanta gazetaro.

En Bruselo, ĉefurbo de Belgujo, okazis la 5 - 20 sept. Universala Kongreso de la Tutmonda Unuiĝo de Internaciaj Asocioj, en kiu estis reprezentataj 112 asocioj apartenantaj al ĉiuj landoj de la mondo. En ĝi plene venkis Esperanto kontraŭ ĉiuj aliaj lingvoj proponitaj kiel helplingvoj por la estontaj kongresoj, ĉar la kongresanoj, eĉ la reprezentantoj de Ido kaj Esperantido, voĉdonis unuanime por Esperanto.

—En Bologna, la 3 - 5 oktobro, plensukcesis la Kvina Kongreso de Italaj Esperantistoj. Kelkaj ministroj kaj episkopoj, per leteroj kaj telegramoj, esprimis siajn bondezirojn pri la esperanta ideo. Tre interesaj kaj fruktopromesaj estis la diskutoj pri la prezentitaj temoj kaj fine oni decidis ke la venonta kongreso okazu en Trento, tuj post la internacia en Praha.

—La Ministro de Instruo de Heslando (sudokcident-germana ŝtato Hessen) donis oficialan dekreton pri instruado de Esperanto en la Heslandaj lernejoj, per kiu li sin montras kiel fervora esperantisto. Tiu dekreto estas vere trafa pledo por nia celado, kiu ebenigas la vojon ne nur al esperantistoj en Hessen sed ankaŭ al tiuj de la aliaj landoj. Ni bedaŭras ke la manko de spaco malpermesas al ni publikigi tian belegan dokumenton.

—En Anglujo la esperanta movado bone progresas kaj ni sciigis pri multenombraj sukcesintaj kursoj en diversaj urboj. Rimarkinda fakto estas ke ĉe la komenco de tiu ĉi jaro oni komencis en taglernejo de Liverpool, kiel eksperimento, esperantan kurson tiel kontentigan ke la tiea Edukada Aŭtoritato sin sentis devigata ordoni ke la kurso estu pligrandigota dum la venonta vintra semestro.

—La Bohema Instru-Ministro dekretis, laŭ peto de niaj ĉeĥoslovakaj samideanoj, permesante instruadon de Esperanto, kiel fakultativa fako, en ĉiuj lernejoj, kie la instruistoj tion petos.

—Jen grava triumfo de Esperanto. En Breslau (ĉefurbo de Silezio, ĉirkaŭ 528.000 loĝantoj kaj 200 lernejoj) estas decidite de la lerneja konsilantaro enkonduki la instruadon de Esperanto en ĉiuj urbaj lernejoj.

—En Japanujo la afero esperanta tute bone sukcesas kaj la entuziasmo de la esperantistoj estas rimarkinda. VII.^a Kongreso de Japanaj Esperantistoj estas baldaŭ okazonta.

—En Francujo ankaŭ vekigās entuziasmo por la lernado de Esperanto. La francaj samideanoj vigle propagandas kaj estas esperinde ke ilia propagando baldaŭ interesos ĉiujn iliajn sampa-trujanojn.

—Malgraŭ la malfavoraj cirkonstancoj nune travivataj de la hungaraj samideanoj, la propagando en Hungarujo bone sukcesas, kaj fruktoj de tiu propagando estas malfermo de kurso por policanoj en Budapesto, kiun ĉeestas la plicestro kun siaj subuloj kaj fondiĝo de novaj grupoj, filioj de la Hungara Laborista Societo. La Budapestaj skoltoj preparas starigon de presoficejo kaj internacia informejo por skoltaj aferoj.



Bibliografio

KATALUNA ESPERANTISTO malfermas ĉi tiun fakon en siaj paĝoj kun la peto al ĉiuj verkistoj kaj eldonistoj de esperantaj verkoj, bonvolu sendi al ni siajn librojn, por ke ni povu recenzi ilin kaj sciigi niajn legantojn pri ilia apero.

En ĝi ni sincere kaj senpartie kritikos la literaturan kaj lingvistikan meriton de tiuj verkoj el kiuj ni estos ricevintaj almenaŭ du ekzemplerojn.

Ni atentigas niajn legantojn pri la grava influo por triumfo de nia kara lingvo, entenata de la ĉiam plie kreskanta aperado de esperantaj verkoj kaj pri la perfektigo atingota en la kono de Esperanto, pere de la atenta kaj konstanta legado de bonaj zorge elektitaj literaturaĵoj.

KATONO



En la venonta numero aperos kelkaj literaturaĵoj kaj artikolo de S-ro Marià Solà, «Gastigo de Aŭstraj Infanoj», kiuj certe igos la enhavon pli interesa kaj alloga. Ni ne povis presi ilin en la nuna numero pro manko de spaco; por eviti tion, ni klopodos presi la tutan tekston per pli malgrandaj literoj.



Por la bona arango de niaj aferoj,

N I D E Z I R A S :

Interŝanĝi KATALUNA ESPERANTISTO kun la ceteraj esperantaj gazetoj.

Ricevi du ekzemplerojn de la novaj esperantaj verkoj por ilia recenzo.

Ĉiuspecajn interesajn informojn pri la disvastigo de Esperanto kaj graveco de la movado.

Mallongajn raportojn pri la agado de la enlandaj esperantaj grupoj kaj societoj.

Ĉefe ni bezonas Redakciajn kaj Administraciajn korespondantojn en urboj kaj vilaĝoj de Katalunujo.

Montriĝu la helpemaj samideanoj !

**DEVO DE BONA SAMIDEANO ESTAS SUBTENI LA
ESPERANTAJN ORGANIZAĴOJN!**

ALIGU AL LA

“KATALUNA ESPERANTISTA FEDERACIO”!